

Bókun Samfylkingar og Framsóknar og frjálsra við seinni umræðu fjárhagsáætlunar 2022 og þriggja ára áætlunar 2023 – 2025.

Sú fjárhagsáætlun sem hér er lögð fram til seinni umræðu inniheldur skýra framtíðarsýn. Framtíðarsýnin er uppbygging og sóknarfæri sem byggð eru upp á ábyrgri fjármálastjórn og traustum rekstri. Á undanförunum tveimur árum hefur samdráttur átt sér stað í samfélaginu en þrátt fyrir það hefur Akraneskaupstaður skilað jákvæðri rekstrarniðurstöðu á árinu 2020 og útkomuspá ársins 2021 gerir ráð fyrir vaxandi rekstrarhagnaði.

Í fjárhagsáætlun ársins 2022 sem nú er lögð fram til seinni umræðu er gert ráð fyrir að rekstrarafkoma A- hluta bæjarsjóðs verði jákvæð um tæpar 225 milljónir króna og að rekstrarafkoma A- og B- hluta verði jákvæð um samtals rúmar 213 milljónir króna.

Á undanförunum misserum hefur Akraneskaupstaður snúið áskorunum í sóknarfæri. Ráðist hefur verið í umfangsmiklar viðspyrnuaðgerðir sem hafa skapað hér störf. Í úttekt KPMG kom fram að tekjur á hvern íbúa hér á Akranesi hafa hækkað og að Akraneskaupstaður sé orðið iðnaðarsamfélag með hærri tekjur nú en áður á hvern íbúa, sem er afar jákvæð þróun.

Vissulega eru vísbendingar á lofti um að launakostnaður hafi farið vaxandi á undanförunum árum hér á Akranesi eins og hjá öðrum sveitarfélögum. Stöðugildum hefur fjölgað einkum í félagsþjónustu og í fræðslu- og uppeldismálum. Skýr merki eru um að kostnaður við félagsþjónustu, sértæk búsetuúrræði og málefni fatlaðra hafi verið að aukast og framlög frá Jöfnunarsjóði séu ekki í takt við þá þróun. Þetta er verkefni sem er í skoðun og nauðsynlegt er að herja áfram á ríkisvaldið að greiða til okkar rétt framlag.

En við erum í sókn. Á undanförunu ári hefur þjónustumiðstöð við Dalbraut 4 verið kláruð, framkvæmdir við nýjan leikskóla farið í gang, stórfelldar endurbætur á Grundaskóla settar á fullt, skólalóðir grunnskólanna fengið nauðsynlegar endurbætur, spennandi atvinnutækifæri í Flóahverfi sett af stað, frábær þróun í gangi á Breiðinni nýsköpunarsetri og í kringum síðustu fjárhagsáætlunargerð opnaði fyrsti búsetukjarni fyrir fatlaða í Skógarhverfi en slík búsetuúrræði höfðu ekki verið byggð hér á Akranesi í nokkra áratugi.

Og sóknin heldur áfram. Aldrei hefur jafn miklu fjármagni verið veitt til fjárfestinga- og framkvæmda og vegna öflugrar fjármálastjórnar er hægt að ráðast í þessar umfangsmiklu framkvæmdir.

Á næsta ári ætlum við að klára byggingu á nýjum leikskóla í Skógarhverfi, við ætlum í stórfelldar endurbætur á grunnskólunum okkar og íþróttamannvirkjunum við Vesturgötu. Höldum áfram með uppbyggingu á nýjum íþróttamannvirkjum á Jaðarsbökkum og hefjum byggingu á nýjum íbúðakjarna fyrir fatlaða. Við ætlum að byggja samfélagsmiðstöð þar sem aðstaða verður fyrir fjölbreytta þjónustu á vegum bæjarfélagsins, m.a. fyrir Fjöliðjuna. Við ætlum að byggja nýtt áhaldahús með aðstöðu fyrir dósamóttöku og halda áfram að endurbæta skólalóðir grunn- og leikskóla. Auk þessa verður farið í úthlutun lóða í Skógarhverfi 3C og 5 og unnið að verulegum framkvæmdum í gatnagerð í Skógarhverfi og Flóahverfi, ásamt viðhaldi eldri gatna.

Þessi framtíðarsýn er í samræmi við þá ímynd sem við viljum skapa sem er að laða nýja íbúa og ný fyrirtæki hingað á Akranes. Vinna með þá staðreynd að það er stutt hingað á Akranes frá höfuðborgarsvæðinu en það er einmitt það sem markaðherferð okkar mun byggjast upp á, á nýja árinu. Sú ákvörðun bæjarstjórnar að hækka ekki álagningaprósentu fasteignagjalda á íbúðar- og atvinnuhúsnæði en verja um leið grunnstoðir samfélagsins er mikilvægur þáttur í þeirri framtíðarsýn.

Hér við seinni umræðu fjárhagsáætlunar þökkum við, bæjarfulltrúar meirihlutans, bæjarfulltrúum minnihlutans fyrir gott samstarf í ráðum og nefndum við gerð fjárhagsáætlunar ársins 2022 og þriggja ára áætlunar 2023 – 2025.

Jafnframt þökkum við bæjarstjóra og embættismönnum bæjarins fyrir afar gott samstarf og þeirra mikla vinnuframlag við þessa fjárhagsáætlunargerð sem nú er lokið.

Með von um áframhaldandi gott samstarf á nýja árinu.

Valgarður L. Jónsson (sign)

Elsa Lára Arnardóttir (sign)

Bára Daðadóttir (sign)

Kristinn Hallur Sveinsson (sign)

Ragnar B. Sæmundsson (sign)